



KATA PENGANTAR



**PERDANA MENTERI
MALAYSIA**

Dengan kadar inokulasi mencapai tahap yang disasarkan dan kesan serius COVID-19 secara keseluruhannya terkawal, lebih banyak sektor ekonomi dan aktiviti sosial dibenarkan beroperasi semula pada separuh kedua 2021. Langkah ini telah meningkatkan potensi bagi pertumbuhan yang kukuh pada 2022. Namun demikian, apabila kita telah bersedia sedia mengorak langkah ke tahun baharu dengan penuh harapan, negara dilanda banjir besar pada Disember 2021 dan Januari tahun ini. Bencana alam ini telah memberikan impak yang besar serta meragut banyak nyawa dan menyebabkan kerosakan harta benda bernilai berbilion ringgit. Meskipun berhadapan dengan kerugian yang besar, bencana tersebut telah mengukuhkan keazaman kita dalam menghadapi cabaran dan mengajar erti sebenar perpaduan, toleransi dan keprihatinan antara satu sama lain seperti yang dicerminkan melalui keberanian dan sikap tidak mementingkan diri #KeluargaMalaysia dalam kalangan semua kaum dan lapisan masyarakat.

Sebagai Kerajaan yang prihatin, kita telah menyediakan pelbagai bantuan kepada rakyat dan perniagaan kecil yang terjejas akibat banjir. Bantuan tersebut termasuk pemberian moratorium bagi pinjaman bank, diskaun baik pulih kenderaan, geran untuk perniagaan mikro dan tidak formal, pindahan tunai secara langsung serta baucar untuk pembelian perabot dan peralatan elektrik baharu. Di samping itu, pelbagai kementerian dan agensi Kerajaan telah menjadikan daerah yang terjejas sebagai kawasan angkat dan menjalankan kerja pembersihan serta pembaikan secara sukarela.

Banjir tersebut telah menyedarkan semua pihak mengenai peri pentingnya mencapai keseimbangan antara pembangunan dengan keperluan melindungi dan memulihara alam sekitar. Justeru, penubuhan Yayasan MySDG oleh Kementerian Kewangan pada Januari adalah tepat pada masanya bagi menyahut seruan agar penekanan yang lebih serius diberikan terhadap pembangunan lestari. Misi Yayasan tersebut merangkumi pengurusan dana amanah bersama Pertubuhan Bangsa-Bangsa Bersatu (PBB) dan menggalakkan pembangunan lestari selaras dengan Agenda 2030.

Ketika Kerajaan sedang menumpukan usaha untuk membangunkan semula negara, konflik di Eropah Timur pula telah meletus. Konflik tersebut merumitkan lagi cabaran sedia ada seperti gangguan rantaian bekalan dan kenaikan ketara harga komoditi, seterusnya meningkatkan kebimbangan mengenai prospek pertumbuhan global. Seajar dengan perkembangan ini, pihak IMF dan Bank Dunia telah menyemak semula unjuran ekonomi global yang lebih perlahan iaitu kepada 3.2% dan 2.9% pada 2022.

Sebagai sebuah ekonomi terbuka, risiko persekitaran luar yang tidak menentu mampu mempengaruhi prospek pertumbuhan ekonomi Malaysia. Namun begitu, struktur ekonomi negara yang pelbagai, asas yang teguh dan pelaksanaan dasar yang tepat pada masanya telah membantu negara mencapai pertumbuhan kukuh pada separuh pertama 2022. Tambahan pula, peralihan kepada fasa endemik dan pembukaan semula sempadan antarabangsa pada 1 April merupakan antara faktor yang akan mengekalkan momentum pertumbuhan ekonomi sepanjang tahun ini. Sehubungan itu, unjuran KDNK Malaysia bagi tahun ini telah disemak semula lebih tinggi kepada 6.5% – 7%.

Walaupun berhadapan pelbagai cabaran luar, namun Kerajaan tetap komited terhadap kebajikan rakyat. Kita sedar mengenai kesukaran yang dihadapi #KeluargaMalaysia berikutan kenaikan harga komoditi yang merupakan fenomena global. Sungguhpun demikian, Kerajaan berusaha sedaya upaya untuk membantu rakyat khususnya golongan B40. Dalam hal ini, Kerajaan telah meningkatkan bantuan tunai melalui Bantuan Keluarga Malaysia di samping meneruskan pelaksanaan siling harga dan memberikan diskaun ke atas barangan dan perkhidmatan penting terpilih, terutamanya melalui subsidi ke atas bahan makanan tertentu, gas memasak, bahan api dan elektrik untuk mengimbangi kesan kenaikan kos sara hidup. Perbelanjaan subsidi serta bantuan sosial pada tahun ini dijangka berjumlah RM78 bilion dan merupakan nilai tertinggi dalam sejarah negara kita. Pada masa yang sama, pasukan petugas khas antara kementerian iaitu Pasukan Khas Jihad Tangani Inflasi telah ditubuhkan pada bulan Jun bagi memastikan usaha menangani kenaikan harga adalah lebih holistik dan mampan.

Melangkah ke hadapan, Kerajaan sentiasa memantau perkembangan ketidakpastian luar yang berterusan dan kesannya terhadap ekonomi negara. Sebagai Kerajaan yang bertanggungjawab, kita sedar mengenai keperluan melaksanakan pembaharuan untuk menjadikan Malaysia sebagai negara yang lebih baik dan berdaya tahan. Kerajaan akan terus berkhidmat kepada seluruh #KeluargaMalaysia dengan berusaha memenuhi harapan dan impian rakyat demi masa depan negara yang lebih makmur dan sejahtera.



DATO' SRI ISMAIL SABRI BIN YAAKOB

Perdana Menteri Malaysia

7 Oktober 2022



PRAKATA



**MENTERI KEWANGAN
MALAYSIA**

Ekonomi Malaysia telah pulih daripada pandemik COVID-19 berikutan kerjasama menyeluruh oleh Kerajaan, sektor swasta dan masyarakat sivil. Ketika negara memasuki fasa pemulihan, ekonomi Malaysia telah berkembang sebanyak 3.1% pada 2021 disokong oleh penambahbaikan permintaan domestik serta pelaksanaan pelbagai pakej bantuan dan rangsangan ekonomi.

Pelaksanaan langkah Bajet 2022 yang mengembang, pembukaan semula semua sektor ekonomi, permintaan domestik dan prestasi eksport yang kukuh telah menyokong momentum pemulihan seterusnya merekodkan pertumbuhan KDNK yang memberangsangkan sebanyak 6.9% pada separuh pertama 2022. Pasaran buruh negara juga bertambah baik dengan kadar pengangguran mencatat 3.7% pada Julai 2022 berbanding paras tertinggi 5.3% pada Mei 2020.

Dari sudut penawaran, sektor perkhidmatan terus pulih dengan kukuh disumbangkan oleh peningkatan ketibaan pelancong serta aktiviti perdagangan dan perniagaan yang bertambah baik selaras dengan peralihan negara kepada fasa endemik di samping pembukaan semula sempadan antarabangsa pada 1 April 2022. Sektor pembuatan juga terus berkembang disokong oleh permintaan yang kukuh terutamanya bagi produk semikonduktor.

Dari sudut permintaan, penggunaan swasta kekal sebagai pemacu utama pertumbuhan didorong oleh permintaan domestik yang mengukuh, keyakinan pengguna yang meningkat dan inisiatif seperti Bantuan Keluarga Malaysia (BKM). Secara keseluruhan, prestasi KDNK yang memberangsangkan pada separuh pertama 2022 seiring dengan langkah dan sokongan dasar yang berterusan telah menyediakan asas kukuh bagi Malaysia mencapai unjuran pertumbuhan KDNK antara 6.5% hingga 7% pada 2022.

Seiring dengan fokus Bajet 2022, beberapa inisiatif utama telah merekodkan pencapaian yang baik termasuk JaminKerja Keluarga Malaysia sebanyak RM4.8 bilion dengan sasaran pewujudan 600,000 peluang pekerjaan dan SemarakNiaga Keluarga Malaysia sebanyak RM40 bilion iaitu pakej pembiayaan komprehensif bagi menyokong usaha pemulihan dan pembangunan kapasiti perniagaan. Sehingga akhir Julai 2022, lebih 264,000 rakyat telah memperoleh pekerjaan di bawah JaminKerja manakala hampir 60,000 perniagaan

disokong oleh SemarakNiaga. Sementara itu, 8.7 juta penerima telah mendapat manfaat daripada program BKM manakala 1.7 juta belia menerima kredit e-dompet sebanyak RM150 melalui program e-Pemula sebagai bantuan kepada rakyat.

Seiring momentum pertumbuhan pada 2022, Kementerian Kewangan telah merangka dasar yang responsif, bertanggungjawab dan bersifat pembaharuan yang membantu pemulihan ekonomi di samping meletakkan asas bagi pembangunan yang lebih mampan. Walau bagaimanapun, Kerajaan peka dengan perkembangan global semasa yang boleh menghalang pemulihan ekonomi negara. Ketegangan geopolitik yang berterusan di Eropah Timur mengakibatkan tekanan ekonomi dalam pelbagai aspek terutamanya peningkatan inflasi global berikutan harga komoditi yang kekal tinggi. Kerajaan melaksanakan kawalan harga dan menambah peruntukan subsidi barangan dan perkhidmatan penting bagi mengurangkan impak kenaikan harga ke atas ekonomi domestik. Di samping itu, Kerajaan telah menambah baik program BKM bagi membantu golongan B40 menangani peningkatan kos sara hidup. Langkah ini membuktikan bahawa Kerajaan sentiasa berusaha memastikan kesejahteraan rakyat terpelihara.

Pertumbuhan ekonomi China yang sederhana serta dasar monetari global yang lebih ketat merupakan antara risiko yang turut memberi kesan ke atas prospek pertumbuhan ekonomi Malaysia. Justeru, pertumbuhan KDNK negara diunjur menyederhana antara 4% hingga 5% pada 2023 selaras dengan semakin semula pertumbuhan ekonomi global yang lebih rendah oleh Bank Dunia dan IMF.

Bajet 2023 akan mengutamakan inisiatif pembaharuan untuk meningkatkan kesejahteraan rakyat, mengukuhkan kelangsungan perniagaan, menggalakkan kemakmuran ekonomi serta menambahbaik sistem penyampaian perkhidmatan awam bagi mengekalkan momentum pertumbuhan ekonomi berikutan landskap pertumbuhan yang lebih mencabar. Bajet 2023 ini dirangka berdasarkan tiga bidang tumpuan utama: iaitu memperkukuh momentum pemulihan ekonomi, membina daya tahan ekonomi dan memacu pembaharuan yang komprehensif.

Melangkah ke hadapan, Kerajaan akan terus memantau perkembangan global dan merangka dasar yang bersesuaian untuk mendepani sebarang kejutan luar, bertindak secara responsif bagi melindungi kehidupan dan kesejahteraan rakyat serta memastikan pemulihan perniagaan. Agenda transformasi digital negara akan dipercepat termasuk langkah seperti penerimgunaan pantas teknologi digital dan merapatkan jurang digital antara bandar dengan luar bandar. Pembaharuan struktural juga akan terus diberi keutamaan bagi meningkatkan potensi ekonomi negara dan daya saing bakat. Seiring dengan usaha bagi membina daya tahan sosioekonomi dan pembangunan yang mampan, kita juga sedang menyemai benih kemajuan demi kemakmuran jangka masa panjang anak-anak #KeluargaMalaysia. *Insyaa-Allah.*





TENGGU DATUK SERI UTAMA ZAFRUL TENGGU ABDUL AZIZ

Menteri Kewangan

7 Oktober 2022

EKONOMI NEGARA 2023

pada harga malar 2015
(bahagian kepada jumlah dalam %)



¹ Termasuk perubahan dalam stok
Sumber: Kementerian Kewangan Malaysia